

# NE'MA PAWLOSE PÊŞIN TÎMOT'ÊYOR'A

## Pêşgotin

Tîmot'êyo xortekî bawermendî ji Asya Biç'ûk bû, dîya wî cihû<sup>f</sup> bû, lê bavê wî yûnan<sup>f</sup> (K'arêd Şandîya 16:1). Pawlos dema şandîtiya<sup>f</sup> xweye dudada bajarê Lîstrayêda r'astî Tîmot'êyo tê. Peyr'a Tîmot'êyo dibe heval-xebatê wîyî pêş, heval-xebatekî wîyî gelekî nêzik, nava r'ewîtîya wîda. Bona wê yekê navê wî gelek cara K'arêd Şandîyada û h'emû ne'-mê Pawlosda tê bîranînê (R'omayî 16:21; Korint'i I, 4:17; Fîlîpî 1:1; T'êsalonîkî I, 1:1; 3:2, 5, 6; T'êsalonîkî II, 1:1 û yêd mayîn). Pawlos gelek cara bona civînê<sup>f</sup> nû aminîya xwe wî anî, nava cûr'e-cûr'e pîrsêd ze'mete giranda.

Ne'ma Pawlose pêşinda, ya ku Tîmot'êyor'a dişîne, sê xemê wî hene:

1. Bona hînkirina şaşê nava civînêda dibêje, wekî miqatî xwe bin û îlahî<sup>f</sup> ji wê hînkirina şaşê ku gihîştîye civîna Efesê (1:3). Ev hînkirina ji fe'mê cihûtîyê û p'ûtp'aristîyê<sup>f</sup> dihat û ser h'imê wê bawerîyê<sup>f</sup> bû ku digotin: «Eva dinya berç'e'vaye t'ebîyetî xirab e». Îdî li gora fe'mkirina wan, meriv<sup>f</sup> t'enê dikaribû pê zanebûn û serwaxtîke<sup>f</sup> sur'e veşartî xilaz bûya, usa jî gerekê xwe ji xwarin-vexwarina û h'al-zewacê dûr bigirtana. Ev hînkirin îro bi navê «Ginostîk» tê gotinê (bi yûnanî «GNOSIS» tê fe'mkirin «zanebûn») û nava sedsalîyêd pêşinda, îlahî sedsalîya duda û sisîyada fire bela bibû.

2. Bona r'abûn-r'ûniştin û qulixê civînê dibêje, li k'u bona xeysetê serwêr, berpîrsîyar û berdestîyada jî dibêje.

3. Şîreta dide Tîmot'êyo. Tîmot'êyo yekî cahil bû, dibe lema ew hinekî ji wê borcdariyê vedik'îşîya (Tîmot'êyo II, 1:7). Şîreta dide wî, ku ew civînêda giran be, bi r'abûn-r'ûniştina xwe bibe xulamekî xweyê nexşê qenc bona Mesîh û cabdariya k'omêd mesîhîyê<sup>f</sup> cûr'e-cûr'e jî hilde ser xwe.

**Serecema fikira ne'mê**

Pêşgotin (1:1-2)

Bona civînê û xebatk'arêd wê (1:3-3:16)

T'emîyêd xebatêye bona Tîmot'êyo (4:1-6:21)

**Silavkirin**

**1** Ji Pawlos, şandîyê<sup>f</sup> Mesîh Îsa, bi e'mirê Xwedêyê Xilazkirê<sup>f</sup> me û Mesîh Îsayê gumana me,

<sup>2</sup> Tîmot'êyoyê lawê xweyî bawerîyêdayî<sup>f</sup> heq-h'elalr'a:

De bira r'e'm, k'erem<sup>f</sup> û e'dilayî ji Bav<sup>f</sup> Xwedê û Mesîh Îsayê Xudanê<sup>f</sup> me li te be.

**Şîretêd derheqa hînkirina derewda**

<sup>3</sup>Gava ez diçûme Makedonyayê, min hîvî ji te kir, ku li Efesê bi-mînî, wekî t'emîyê bidî çend kesa, ku hînkirina ner'ast hîn nekin <sup>4</sup>û guh nedine ç'ilovîskîya û r'eqema silsileta<sup>f</sup> ku xilazîya wan t'une. Ev yek hê şer'-de'wa t'evr'adike, ne ku t'ivdîra\* Xwedêye ku bi bawerîyê tê naskirinê\*\* mîyaser dike. <sup>5</sup>Serê t'emîyê h'izkirin e, ku ji dilê sax, bi îsafat r'ih'et û ji bawerîya bêdur'ûtî

ye. <sup>6</sup>Hinek jê dager'îyan û pey gotinêd p'ûç' k'etin. <sup>7</sup>Dixwazin bibine dersdarêd Qanûnê, lê ew xwexa jî nizanin çi dibêjin, ne jî wan tiştêd ku didine zora xwe fe'm dikin.

<sup>8</sup>Em zanin ku Qanûn qenc e, heger yek bi qanûnî wê biqedîne. <sup>9</sup>Belê fe'mdarî ye, ku qanûn bona r'asta nayê dayînê, lê bona neheq û serh'işka, bona nep'ak û gunek'ara<sup>f</sup>, bona mir'dar' û h'erama<sup>f</sup>, bona bavkuj û dêkuja, bona mêrkuja, <sup>10</sup>bênamûsa, k'ona, dizêd merîya, derewîn û şe'dederewa ye û bona her kesêd dine ku tiştêd miqabilî hînkirina saxlem dikin. <sup>11</sup>Ev hînkirin li Mizgînîya xweyîr'ûmete Xwedêyê hêjayî şikirîyê digire, k'îjan li min hatîye spartinê<sup>f</sup>.

**Şêkirandina hindava r'e'ma Xwedêda**

<sup>12</sup>Ez ji Mesîh Îsayê Xudanê me r'azî me, Yê ku qewat da min, ez

\* 1:4 «T'ivdîra Xwedê» aha jî tê fe'mkirinê: «Wek'iltîya Xwedê, ya ku da destê cime'ta Xwe».

\*\* 1:4 Aha jî tê fe'mkirinê: «T'ivdîra Xwedêye ku bi bawerîyê tîne sêrî<sup>f</sup>».

amin h'esab kirim, danîme ser vê xizmetk'ariyê. <sup>13</sup> Min jî berê Ew bêhurmet dikir, dizêrand û neyartî li Wî dikir, lê r'e'm li min bû, çimkî min nebawerîyêda bi nezanîya xwe kirin\*. <sup>14</sup> K'erema<sup>f</sup> Xudanê me p'ir' ser minda r'ijîya, t'evî bawerî û h'izkirina Mesîh Îsa. <sup>15</sup> Vê gotinêda xêlif t'une û lap hêjayî qebûl kirinê ye, ku: «Mesîh Îsa hate dinê, gunek'ara xilaz<sup>f</sup> bike», serê k'îjana ez im. <sup>16</sup> Lê bona wê yekê r'e'm li min bû, wekî Mesîh Îsa ser min, çawa serê gunek'ara t'emamiya sebira Xwe bide k'ifşê, çawa nexşek bona wan, yêd ku wê bawerîya xwe Wî bînin, jîyîna<sup>f</sup> h'eta-h'etayê bistînin. <sup>17</sup> Awa bira wî P'adşayê h'eta-h'etayêyî nemirî û nexuya, Xwedêyê bêşîrîkî-bêhevalr'a hurmet û r'ûmet be h'eta-h'etayê! Amîn<sup>f</sup>.

<sup>18</sup> Vê t'emîyê ez didime te, lawê min Tîmot'êyo, li gora wan p'êxembertîyêd<sup>f</sup> ku pêşda bona te bûn, wekî tu bi wan şer'ê xweyî qenc bikî, <sup>19</sup> dest ji bawerîyê neke û îsafa xwe r'ih'et xwey ke. Hineka ev yek ji xwe dûr xistine, dewra bawerîya xwe welger'andin. <sup>20</sup> Ji

wan bûn, Hûmenayo û Skender, yêd ku min dane destê mîrêcin<sup>f</sup>, wekî ew hîn bin r'astîya Xwedê bêhurmet nekin.

### Derheqa dua û civînêda<sup>f</sup>

**2** <sup>1</sup> Awa ez hîvî dikim, berî her tiştî bona h'emû meriva<sup>f</sup> dua bikin, r'eca kin, lava kin, r'azî-bûnê bidin, <sup>2</sup> usa jî bona p'adşa û h'emû serwêra, wekî em jîyîneke e'dil û seqir'î derbaz kin, bi t'emamiya xwedênasîyê û maqûlîyê. <sup>3</sup> Li ber Xwedêyê Xilazkirê me ev e qenc û li Wî xweş, <sup>4</sup> ku dixwaze h'emû meriv xilaz bin û r'astîyê nas kin\*. <sup>5</sup> Çimkî Xwedêk heye û nava Xwedê û merivada jî navçêtîk, Mesîh Îsayê Meriv, <sup>6</sup> ku Xwe ji ber k'ir'îna gişkava da. Ev yek r'ast wextda bû îzbatî, ku Xwedê dixwaze h'emû xilaz bin. <sup>7</sup> Û bona vê yekê ez dannasînkir û şandî hatime k'ifşkirinê, (ez r'ast dibêjim, derewa nakim), necihûyar'a bûme dersdarê bawerîyê û r'astîyê.

<sup>8</sup> Awa ez dixwazim ku mêr her dera destêd xweye h'elal bilind kin, bê hêrs û bê şer'-de'w\* dua bikin.

\* <sup>1:13</sup> K'arêd Şandîya 8:3; 9:4-5.

\* <sup>2:4</sup> Hezekîyêl 18:23.

\* <sup>2:8</sup> Aha jî tê fe'mkirinê: «Bê dudilî».

<sup>9</sup> Usa jî bira k'ulfet<sup>f</sup> bi k'incêd layîq, şermê û berbihêrîyê xwe bi-xemilînin, ne ku bi gulî-gujanga, yan zêr', yan bi dur'a<sup>f</sup>, yan jî bi k'incêd biha\*, <sup>10</sup> lê bi kirêd qenc, çawa li wan k'ulfeta dik'êve, yêd ku navê xwedênasîyê hildane ser xwe. <sup>11</sup> Bira k'ulfet ker' hîn be, bi t'emamîya guhdarîyê. <sup>12</sup> Ez îzinê nadime k'ulfet, ku hîn bike, ne jî h'ukumî ser mêr bike, lê bira deng neke. <sup>13</sup> Çimkî pêşîyê Adem<sup>f</sup> xulîqî, paşê Hêwa\* <sup>14</sup> û Adem nexapîya, lê jin xapîya û neheqî kir. <sup>15</sup> Lê jin h'alê zar'anînêda jî wê xilaz be\*, heger bi berbihêrîyê nava bawerîyê, h'izkirinê û paqiyâyêda bimînin.

### Bona serwêrêd civînê

**3** <sup>1</sup>Vê gotinêda xêlîft'une: Heger temê yekî li serwêrtîyê heye,

ew şixulekî qenc dixwaze. <sup>2</sup> Awa serwêr gerekê bêqusûr be, mêrê jinekê be, xwegirtî, aqilda giran, maqûl, mêvanh'iz, hînkirinêda serxwe be\*, <sup>3</sup> ne serxweş, ne sir'tûk, lê berbihêr, ne şer'ûd, ne p'ereh'iz. <sup>4</sup> Bira malxêtîyê r'ind li mala xwe bike, zar'êd xwe gur'a<sup>f</sup> xweda her aliyava maqûlîyêda mezin ke. <sup>5</sup> (Çimkî heger yek nizane malxêtîyê li mala xwe bike, wê çawa bikaribe civîna<sup>f</sup> Xwedê xwey ke?) <sup>6</sup> Bira ne jî bawermendê nû be, ku nebe k'ubar be, dîwana wî jî mîna ya mîrêcin bê kirinê. <sup>7</sup> Wekî din jî gerekê qedirê wî cem yêd ji civînê der jî hebe, ku nebe bê r'ezîlkirinê û bik'êve t'eleka mîrêcin.

### Bona berdestîyêd civînê

<sup>8</sup> Usa jî bira berdestî giran bin, xeberdanêda dur'ûtîyê nekin, xwe

\* <sup>2-9</sup> Petrûs I, 3:3.

\* <sup>2:13</sup> Destpêbûn 2:7; 2:21-22; 3:1-6.

\* <sup>2:15</sup> Me'na vê r'êzê ze'met e. Dewsa «h'alê zar'anînêda jî» yûnanî aha jî tê fe'mkirinê: «bi zar'anînê». K'itêba Pîroz hîn dike, ku zar' dayîn û berek'e-tîya Xudan e, ku dê û bavar'a têne dayînê (Zebûr 127, 128). K'itêba Pîroz hîn nake ku zar'anîn şertê mecala xilazbûna k'ulfeta ye. Ne jî ev r'êz soz dide ku zar'anîna k'ulfetêd xwedênas wê bê êş û cefa be yan k'ulfet sax bimîne. Xuya dibe ku Pawlos miqabilî dersdarêd derewîn diçe û hîn dike ku zar'anîn ne gune ye, lê belê heger k'ulfet mêr ke û zar'a bîne, ev yek tişteki qenc e. Hingê hineka hîn dikir û nedihîştin ku meriv bizewicin yan mêr kin (Tîmot'êyo I, 4:3). Ji sedsalîya yekê h'eta sisîya hînkirina «ginostîkîyê» fire bela dibû û digot, ku p'êşê kevantîyê û zar'anînê gune ye.

\* <sup>3:2-7</sup> Tîto 1:6-9.

nedine şeravê, pey k'eda h'eram nek'evin. <sup>9</sup> R'astîya bawerîyêye e'yanbûyî\* bi îsafa r'ih'et xwey kin. <sup>10</sup> Û evana jî bira pêşda bê-ne cêr'ibandinêf, heger tişteker wan t'unebe, hingê bira berdestîyê bikin. <sup>11</sup> Usa jî bira jinêd wan\* giran, ne buxdanbêj, lê xwegirtî, her tiştîda amin bin. <sup>12</sup> Berdestî gerekê mêrê jinekê be, qenc malxêtiyê li zar' û mala xwe bike. <sup>13</sup> Ewêd ku r'ind berdestîyê dikin, xwer'a dereceke bilind qazinc dikin û serbestîkef mezin dest tînin bona bawerîya Mesîh Îsa.

### Sur'a xwedênasîyê

<sup>14</sup> Ez ku van tiştî ter'a dinivîsim, guman heye ezê zûtîrekê ser teda bêm. <sup>15</sup> Lê heger ez derengî jî bik'evim, tê zanibî gerekê çawa mala Xwedêda r'abin-r'ûnên, ya ku civîna Xwedêyê sax e, stûn û h'îmê r'astîyê ye. <sup>16</sup> Bê zebandan, gelekî k'ûr e sur'a xwedêp'aristîya me:

Ew bi bedenî xuya bû,  
bi R'uh' r'astîya Wî hate îzbat-  
kirinê,  
milyak'etava<sup>f</sup> hate dîtinê,  
nav mileta hate dannasînkirinê,

dinyayêda hate bawerîkirinê  
û r'ûmetêr'a hate hilatinê.

### Dersdarêd derew

**4** <sup>1</sup> R'uh' aşkere dibêje, ku r'ojêd axirîyêda hinek wê ji bawerîyê bik'evin, guh bidine r'uh'êd derewîn û hînkirinêd cina<sup>f</sup>. <sup>2</sup> Ew hînkirin bi dur'ûtîya derewîna dibin, îsafa k'îjana k'îzirî ye. <sup>3</sup> Ew meriv h'al-zewacê didine hildanê, ji wan xwarina paşda didine girtinê, k'îjan Xwedê ew bona bawermend û r'astînaskirîya e'firandine, ku bi r'azîbûnê bixwin. <sup>4</sup> Her tiştê ku Xwedê e'firandîye qenc e û tişteki h'eram têda t'une, heger bi r'azîbûnê tê qebûlîkirinê, <sup>5</sup> çimkî bi xebera Xwedê û dua qebûl dibe.

### Qulixk'arê Mesîh Îsayî qenc

<sup>6</sup> Heger tu van şîreta bidî xûşk-bira, tê bibî qulixk'arê Mesîh Îsayî qenc, çawa tu xwexa jî bi wan gotinêd bawerîyê û hînbûna qence ku tu pey çûyî, qinyat dibî. <sup>7</sup> Xwe ji ç'i-lovîskîyêd pîraye h'eram dîr xwey ke. Xwe xwedênasîyêda hîndar<sup>f</sup> ke. <sup>8</sup> Hîndarîya qalib kêrî hindik tiştî tê, lê ya xwedênasîyê kêrî her tiştî tê,

\* <sup>3:9</sup> Bi yûnanî zebanê xwey bi zebanê aha ye: «Sur'a bawerîyê». Ev tê fe'mkirinê ku sur'a veşartî e'yan bû.

\* <sup>3:11</sup> Aha jî tê fe'mkirinê: «Jinêd berdestî».

sozê wê hin li vê dinê heye, hin jî li wê dinê. <sup>9</sup>Vê gotinêda xêlif t'une û lap hêjayî qebûl kirinê ye. <sup>10</sup>Bona vê yekê em dixebitin û diçerçirin, çimkî em gumana xwe li Xwedêyê sax tînin, ku Xilazkirê h'emû meriva ye, îlahî<sup>f</sup> Yê bawermenda.

<sup>11</sup>T'emîya van tişta bide û hîn ke. <sup>12</sup>Nebe ku yek cahiltîya te bêhurmet ke, lê tu bawermendar'a bibe nexşek, xeberdanêda, r'abûn-r'ûniştinêda, h'izkirinêda, bawerîyê û h'elalîyêda. <sup>13</sup>H'eta hatina min xwe bide wê yekê, ku cime'têr'a nivîsarêd<sup>f</sup> pîroz bixûnî, şîret kî, hîn kî. <sup>14</sup>Hindava wê p'êşk'êşaf xweye r'uh'anîda bê xem nîbe, ya ku bi p'êxembertîyê ter'a hatîye dayînê, gava berpirsîyara destê xwe danîne ser te. <sup>15</sup>Guhê te ser wan tişta be û nava wanda bimîne, wekî pêşdaçûyîna te h'emûyava e'yan be. <sup>16</sup>Haş ji xwe û hînkirina xwe hebe. Her gav nava wanda bimîne, çimkî bi vî tiherî tê xwe jî xilaz kî û wan jî, k'îjanêd guhdarîya te dikin.

**Cabdarîya bona  
e'mirê mezin û biç'ûka**

**5** <sup>1</sup>Dilê kalemêra neêşîne, lê dil bide wan, çawa bavê xwe.

Cahila çawa birayêd xwe h'esab ke\*, <sup>2</sup>pîra çawa dîya xwe, k'ulfe-têd cahil çawa xûşkêd xwe, weke şîrê h'elal.

**Jinebîyêd e'detî**

<sup>3</sup>Qedirê jinebîya bigire, yêd ku bi e'detî jinebî ne. <sup>4</sup>Lê heger zar' yan neviyêd jinebîkê hebin, bira ew zar' pêşîyê mala xweda hîn bin çawa xwedênasîya xwe bidine k'îfşê û bi vî tiherî deynê dê û bavê xwe vege'rinin, çimkî ev yek li Xwedê xweş tê. <sup>5</sup>Jinebîya e'detî ew e, ya ku t'enê maye û gumana xwe danîye ser Xwedê, şev û r'ojêd xwe bi dua û r'eca derbaz dike. <sup>6</sup>Lê ya ku k'êfa dilê xwer'a ye, mirîya neç'e'lkirî ye. <sup>7</sup>Van tişta t'emî ke, wekî bêlek'e bin. <sup>8</sup>Lê heger merivek bona xwexatîya xwe, îlahî bona mala xwe xem nake, ewî bawerî ink'ar<sup>f</sup> kirîye û ji nebawera jî xirabtir e.

<sup>9</sup>Bira navê wê def't'era jinebîyada bê nivîsarê, k'îjan ji şêst salî kêmtir nîne, carekê jî mêrkirî bûye, <sup>10</sup>bi kirinêd qencva jî berbiç'e'v e: Mesele, zar' mezin kiribin, mêvan qebûl kiribin, nigêd bawermenda şuştibin, dest avîtibe

\* <sup>5:1</sup> Qanûna K'ahîntîyê 19:32.

k'etîya û bona her şixulê qenc jî hazir sekinî ye.

<sup>11</sup> Lê jinebîyêd cahil qebûl neke, çimkî gava evana temê xwe xirab dikin, berê xwe ji Mesîh diguhêzin, dixwazin mêr kin <sup>12</sup> û bi vî awayî evî sûcî hiltînine ser xwe, çimkî sozê berê dane alîkî.\* <sup>13</sup> Serda jî mal bi mal diger'in, xwer'anedîtî hîn dibin, ne t'enê xwer'anedîtî ne, usa jî gilîger'o, t'evî şixulê xelqê dibin û tiştêd necayîz xeber didin. <sup>14</sup> Awa ez dixwazim ku jinebîyêd cahil mêr kin, zar'a bînin û malkir bin, wekî zimên nekine devê neyara. <sup>15</sup> Çimkî îdî hinek jinebîyêd cahil xalîfîn<sup>f</sup>, pey mîrêcin çûn. <sup>16</sup> Heger jinebîyêd bawermendekê\* hebin, bira ew alîk'arîya wan bike û civînê bargiran neke, wekî civîn bikaribe alîk'arîya jinebîyêd e'detî bike.

### Bona berpîrsîyara

<sup>17</sup> Ew berpîrsîyarêd ku serwêrtî-yê r'ind dikin, bira dubare hêjayî qedir bin, îlahî ewêd ku xeberdan û hînkirinêda dixebitin. <sup>18</sup> Çimkî nivîsar dibêje: «Devê gayê bêderêda dixebite girînedê»\* û «P'ale hêjayî heqê xwe ye»\*\*. <sup>19</sup> Xeyba hindava berpîrsîyarda bawer neke, heger du yan sê şe'de t'unebin\*. <sup>20</sup> Berpîrsîyarêd ku nava gunada dimînin, li ber h'emûya lê hilêf, wekî yêd mayîn jî bitirsin.

<sup>21</sup> Ez li ber Xwedê, Mesîh Îsa û milyak'etêd bijartî dikime deynê stûyê te, ku tu van şîreta bê t'agêrîf xwey kî, tiştêkî bi firqîyê nekî.

<sup>22</sup> Destê xwe zû daneyne ser ye-kî bona xizmetk'arîya Xudan, ne jî t'evî gunêd yêd mayîn bî. Xwe paqij xwey ke\*.

\* <sup>5:11-12</sup> Hinek aha fe'm dikin: Jinebîyêd civînêda navêd xwe bona xizmetkirinê defî'era civînêda didane nivîsarê, lema tê gotinê, ku jinebîyêd cahil qebûl neke, çimkî bi wê qîrarê navêd xwe didane nivîsarê, wekî dîsa mêr nekin, lê t'enê civînêr'a xizmetîyê bikin. Lê gava dixwestin mêr bikirana, soz-qîrarê xwe dit'er'ibandin.

\* <sup>5:16</sup> Nav destnivîsarêd qencda «bawermend» qisimê jinê tê fe'mkirinê, lê destnivîsarêd hinekda «bawermend» tê fe'mkirinê hin qisimê jinê, hin jî mêr, usa jî hinek destnivîsarada t'enê mêr tê fe'mkirinê.

\* <sup>5:18</sup> Qanûna Ducarî 25:4.

\*\* <sup>5:18</sup> Lûqa 10:7; Metta 10:10.

\* <sup>5:19</sup> Qanûna Ducarî 17:5-7; 19:15; Metta 18:16.

\* <sup>5:22</sup> Tîmot'êyo I, 4:14; K'arêd Şandîya 6:6; 13:1; Tîmot'êyo II, 1:6.

<sup>23</sup> Ji vir şûnda t'enê avê vene-xwe, lê hinekî jî şeravê t'ev ke, bona cîyê meh'andina xwarinê, ku zû-zû nexweş dik'evî.

<sup>24</sup> Hinek hene, ku gunêd wan k'ifş in û r'ast wan dibine ber dîwanê, lê gunêd hineka jî paşê wê k'ifş bin. <sup>25</sup> Usa jî kirinêd qenc k'ifş in û ew kirinêd ku ne k'ifş in, ew jî veşartî namînin.

### Bona xulama

**6** <sup>1</sup> Ewêd ku bin nîrê xulam-tîyêda ne, bira axayêd xwe h'esab kin çawa hêjayî qedirê bilind, wekî navê Xwedê û hîn-kirina me neyê bêhurmetkirinê. <sup>2</sup> Axayêd k'êye bawermend hene, bira wan bêhurmet nekin, çimkî ew birayêd hev in. Lê bira xulam hê r'ind xulamtîyê bikin, çimkî yêd ku k'arê ji xizmetk'arîya xulama distînin, bawermend in û delal in.

### Xizna r'ast

Van tişta hîn ke û şîret ke. <sup>3</sup> Heger yek tişteki din hîn bike û gotinêd Xudanê me Îsa Mesîhe saxlem û hînkirina xwedêp'a-

ristîya me ne qayl e, <sup>4</sup> ew yekî k'ubar e û tişteki nizane. Ew nexweşîya şer' û de'wava girtî ye, ji wê jî pêşda tèn: H'evsûdî, neyartî, gotinêd ner'êda, şikêd xirab <sup>5</sup> û şer'ûdî. Ev h'emû tişt ji nava merivêd qafseqet û ji r'astîyê şûna r'eşva çûyî pêşda tèn. Evana xwedênasîyê h'esab dikin, çawa kanîya k'arê.

<sup>6</sup> Belê xwedênasî k'ara ser k'arê ye, heger bi r'azîbûnê be. <sup>7</sup> Me t'u tişt neaniye dinê û emê nikaribin t'u tiştî jî bibin\*. <sup>8</sup> Lê k'inc û xurekê me hebin, bi wan em r'azî bin\*. <sup>9</sup> Lê ewêd ku dixwazin dewletî bin, têne cêr'ibandinê, dik'evine t'eleka û gelek temêd axmax û zîyan-k'ar, k'îjan mêriv nuqî mîrat'iyê û wêranbûnê dikin\*. <sup>10</sup> Çimkî p'ereh'izî kanîke her cûr'e xirabîyê ye. Hineka xwe dane wê, ji bawerîyê xalifîn û xwe kirine xweyê kul û derda.

### T'emîyêd Pawlos bona Tîmot'êyo

<sup>11</sup> Lê tu, merivê Xwedê ji van tişta bir'evê û pey heqîyê,

\* <sup>6:7</sup> Îbo 1:21.

\* <sup>6:8</sup> Gotinêd Silêman 30:8.

\* <sup>6:9</sup> Gotinêd Silêman 23:4; 28:22.



xwedênasîyê, bawerîyê, h'izkirinê, sebirê û milûktîyê her'ê. <sup>12</sup> Leca bawerîyêda qenc bir'eve, jîyîna h'eta-h'etayê qazinc ke, k'îjanêr'a tu hatî gazîkirinê û li ber gelek şe'da te ew îqrara<sup>f</sup> qenc îqrar kir. <sup>13</sup> Li ber Xwedêyê ku e'mir dide h'emû e'firîna û li ber Mesîh Îsayê ku li ber Pîlatoyê<sup>f</sup> Pontîyo şe'detîya îqrara qenc da, ez t'emîyê didim te\*, <sup>14</sup> ku tu vê t'emîyê bêlek'e û bêqusûr xwey kî, h'eta xuyabûna Xudanê me Îsa Mesîh. <sup>15</sup> Xuyabûna Wî wê wextê xweda ji alîyê Yê hêjayî şikirîyê û T'enêyî qewat, P'adşayê p'adşaya û Xudanê xudanada e'yan be. <sup>16</sup> T'enê Ewî nemirî ye, nava r'onayîyêda ye, ku t'u kes nikare nêzîk bê. T'u qûl-benda Ew nedîtîye û ne jî dikare bibîne. Qedir û qudreta h'eta-h'etayê Wîr'a be! Amîn\*.

### T'emîya bona dewletîya

<sup>17</sup> T'emîyê bide dewletîyêd vê dinê, bira babax nebin û gumana xwe nedine ser hebûka<sup>f</sup> p'ûç'e derew, lê li ser Xwedêyê ku her tiştî bi mer'danî dide me, wekî em miraz pê bikin\*. <sup>18</sup> Bira qencîya bikin, bi kirinêd qenc dewletî bin, mer'd bin û p'arevekirinêr'a jî hazir.

<sup>19</sup> Bi vî tiherî ewê xwer'a xiznekê t'op kin, h'îmekî qenc bona axretê, wekî wê jîyîna ku r'astî jîyîn e qazinc kin.

### T'emîyêd axirîyê

<sup>20</sup> Tîmot'êyo! Çi ku li te hate spartinê xwey ke. Ji gotinêd p'ûç'e h'eram û şer'-de'wa dûr be, ku bi derew navê «zanebûn» dane ser. <sup>21</sup> Hineka xwe dane vê yekê û bi vî awayî ji bawerîyê xalifin.

K'erema Xwedê wer'a be.

\* <sup>6:13</sup> Yûh'enna 18:37.

\* <sup>6:16</sup> Derk'etin 33:20.

\* <sup>6:17</sup> Zebûr 62:10.